



## Komunikadu Imprensa

### Tribunál Distritál Oe-Cusse

2 Agostu 2017

#### **Tribunál Distritál Oe-Cusse kondena pena prizaun efetiva fulan neen iha prizaun ba arguidu krime violénsia doméstika**

Tribunál Distritál Oe-Cusse kondena arguidu JL ho pena prizaun efetiva fulan 6 prizaun tanba provadu komete krime ofensa ba integridade fízika simples ho natureza violénsia doméstika hasoru nia feen. Leitura sentensa ne'e hala'o iha 26 Jullu 2017, iha Distritu Oe-Cusse.

Antes ida-ne'e, iha 21 Outubru 2015, Tribunál Distritál Oe-Cusse kondena ona arguidu ho pena prizaun fulan 9 suspende ba tinan 1 tanba komete krime hanesan (ofensa ba integridade fízika simples ho natureza violénsia doméstika hasoru nia feen).

“Tuir lei, antes Prokuradór hahú halo inkéritu ba krime foun, Prokuradór tenke hato'o pedidu ba Tribunál hodi revoga pena suspensa ne'ebé antes ne'e aplika ba arguidu iha kazu anterior ne'ebé nia simu ona kodenasaun fulan 9 iha prizaun ne'ebé suspende tiha ba tinan 1,” dehan Luis de Oliveira Sampaio, Diretór Ezekutivu JSMP.

Iha artigu 72 Kódigu Penál define katak “kuandu iha tempu ne'ebé pena prizaun nia ezekusaun suspende hela kondenadu la kumpre obrigasaun ne'ebé aplika hela ba nia ka hetan julgamentu no kondenasaun tanba krime seluk, Tribunál haree ba sirkunstánsia sira iha ne'eba, bele altera rejime ne'ebé fiksa tiha ona ba suspensaun ba pena prizaun nia ezekusaun, modifika obrigasaun ka fo adverténsia solene ba kondenadu nu'udar kazu ida-idak nia sirkunstánsia”.

Tuirmai iha artigu 73 Kodigu Penál (KP) kona-ba revogasaun ba suspensaun, iha alinea (2) dehan katak “Suspensaun ba pena prizaun nia ezekusaun tenke revoga duni kuandu, iha períodu respetivu nia laran, kondenadu halo krime dolozu tanba ne'ebé nia hetan kondenasaun ho prizaun efetiva”.

Iha kazu ne'e, Prokuradór falla atu halo-tuir provizaun hosi artigu 73 KP. Tanba ne'e Tribunál ignora alegasaun finál hosi Prokuradór ne'ebé halo referénsia ba sentensa iha kazu anteriór (ho pena suspensaun) ne'ebé aplika ba arguidu. Tuir Tribunál ninia entendementu ba kazu ne'e katak durante prosesu inkéritu mak Prokuradór deskobre katak arguidu iha hela períodu suspensaun, Prokuradór imediatamente tenke apresenta pedidu ba Tribunál atu revoga pena suspensa ne'e no aplika pena efetiva ba arguidu antes prosesu kazu foun. Tanba ne'e-duni, Tribunál julga

Rua setubal, Colmera, Dili Timor Leste

PoBox: 275

Telefone: 3323883

[www.jsmp.tl](http://www.jsmp.tl)

[info@jsmp.minihub.org](mailto:info@jsmp.minihub.org)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPtl

independente kazu ne'e hosi kazu anterior ho konsiderasaun katak periódu suspensaun remata ona iha Janeiru 2017.

Prokuradór akuza katak iha 28 Novembru 2016, maizumenus iha tuku 22:00 kalan, arguidu tuku dala 1 iha lezada nia matan-fukun parte karuk, tuku dala 2 iha lezada nia ulun no tuku dala 1 iha lezada nia reen-toos. Agresaun ne'e kauza lezada sente moras, bubu no mean. Kazu ne'e anexa mós ho relatóriu medíku hosi Pradet no fotografia hosi VPU-PNTL.

Prokuradór akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 2, 3 letra(a) no artigu 35 letra (b) Lei Kontra Violénsia Doméstika.

Iha julgamentu, arguidu konfesa faktus hotu iha akuzasaun, arguidu mós deklarara katak arrepende ona nia hahalok, diak malu ona ho lezada no promete katak sei la komete tan krime hanesan hasoru lezada.

Deposis rona tiha deklarasaun hosi arguidu no tanba arguidu konfesa faktus hotu iha akuzasaun, Tribunál decide atu presinde lezada nia deklarasaun ne'ebé antes ne'e prokuradór arola ona atu rona nia depoimentu.

Iha alegasaun finál, prokuradór konsidera arguidu provadu komete krime hasoru lezada tuir faktus iha akuzasaun no arguidu la arrepende ninia hahalok. Prokuradór mós konsidera katak antes ne'e iha 21 Outubru 2015, Tribunál kondena ona arguidu ho pena prizaun fulan 9 suspende ba tinan 1 no arguidu kontinua komete krime hasoru lezada. Tanba ne'e husu ba Tribunál atu revoga tiha suspensaun ne'e no aumenta tan ho krime ne'ebé arguidu foin komete ho pena prizaun fulan 6 no halo komulasaun hamutuk ho pena ba krime antes atu kondena arguidu ho prizaun tinan 1 fulan 3.

Iha parte seluk, Defeza haktuir katak arguidu konfesa faktus hotu iha akuzasaun no iha oan nain 2. Tanba ne'e husu ba Tribunál atu aplika pena suspensa to'o tinan 5 no aplika mós regra ba konduta ho aprezentasaun periódikamente iha polisia kada fulan dala 1 atu nune'e arguidu kontinua responsabiliza ba nia familia.

Tribunál prova katak arguidu provadu kontinua komete krime hasoru nia feen. Tribunál mós konsidera katak arguidu la hatudu ninia arrependementu durante simu kondenasau ho pena suspensa ba kazu violénsia doméstika hasoru ninia-feen ne'ebé Tribunál aplika ona ba arguidu. Tanba ne'e, Tribunál konklui prosesu ne'e no kondena arguidu ho pena efetiva fulan 6 prizaun.

Kazu ne'e rejista iha Tribunál ho Nú. Prosesu: 0224/16.OESIC. Julgamentu ne'e prezide hosi Dr. João Ribeiro. Prokuradór representa husi Dr. Mateus Nesi no arguidu hetan Defeza husi Dr. Marcelino Marques Coro hosi Defensória Pública.

Atu hetan informasaun kompleitu bele kontaktu ba:

Luis de Oliveira Sampaio

Diretór Ezekutivu JSMP

E -mail: [luis@jsmp.tl](mailto:luis@jsmp.tl)